

Dibsho ni Inpaspasing nonta ira Apostol (ACTS)

Lessons Para iren Anak

LESSON 1

Bible Story: **Inon-an nonta ira Apostol sota Inkayang nen Jesus ded Dangit**

Scripture: Acts 1

Learning Goal: *Evatan ira ni anak ey sota ira emati ket aliven aabos sha ta wara sota Ispirito Santon nan-iyen son si-khara.*

Review question:

1. Apay nga nandekab ira sota totoo nen Jesus nonta inamtaan sha ey nan-ongal Si-khato?
2. Apay ngata ja edigat so nonta ira apostol ja mematin shagos ja si Jesus ket nan-ongal?
3. Ngantoy dag-en nen Apo Shiyos so nonta memati son Jesus, angken eg sha inon-an?
4. Medadsakan ngata si Jesus no wara i showashowa ni pamati tayo?
5. Nganto sota dingkha nen Jesus ja naysalakanan tayo?

A. Introduction

Sakbay ya ondaw kito shi Acts chapter one, piyan kon nemnemen jo no waray timpon singa say deknayo ket nay-olay kayo ono singa aabos jo!

Sipa son si-khayo i wara i tatang, nanang, ono agi to ja wara shi aravin dogad? Sakbay ya ondaw ira shi abroad, eshakil nin i sha kaibilin. Pansingsingpet kayo, singpet jo i jo kepan-iskowida, tan eshakil pay i sha kaibilin. Sha kaikowan ira iyay ta ensemek shakajo.

Si Jesus, sakbay ya nay-oli Si-khato shi dangit, nan-iyen nin shiya dobong ni 40 ja akhew manipod nonta nan-ongal Si-khato et eshakil i inbilin To so nonta ira totoo To, ta ensemek To ira tan ensemek shakito.

Tedon tawen na nay-ol-olop sota ira discipolos son Jesus. Jet intentenengan shay toro To maypangkep ni pantoshayan nen Apo Shiyos tan inon-an sha ira sota milagron dingdingkha To. Nem sigosho nonta inon-an sha si Jesus jen naydansa shi koros tan etey, nadeknaren mebaybay-an ma ira.

No say ninemnem nonta ira discipolos ket aabos sha nonta etey da si Jesus ket aliven agpayso. Inkowan nen Jesus son si-khara ja edawag nonta sakbay ya naydansa shi koros ey manda-kham Si-khato ni digat, nem man-ongal met lang. Matthew 26:32 “Nem no meksheng i pan-ongal ko, mepangdo-ak ja ondaw shi Galilia ey si-khayo.” (Matthew 16:21, Matthew 17:12, Mark 8:31, Luke 9:22)

Angkhen inkowan nen Jesus so nonta ira discipolos sota mepesamak ali son Si-khato, karakdan son si-khara ket etakot tan nanshanag ira nonta emandakham ma si Jesus ni digat. Edigat son si-kharen asen sota ayshi i basbasol ton Anak nen Apo Shiyos ja inpabasolan sha tan indansared koros ni Romano. Etakot tan nanshanag iray disipolos.

No maminsan sota tayo kepanshanag i kaonsa-din say eg tayo nemnemen sota podnon inkokowan nen Jesus shi Esel To. No wara ira sota dekna tayon kaon-abak son si-khatejo, kasapolan na asen tayo sota kinapodno shi panbasa tayo ni Biblia.

Nonta maykatdon akhew ni inkaydiyong nen Jesus, inpan-ongal nen Apo Shiyos manipod shi patey! Dingkhaton kosto sota inkowan To so nonta discipolos ja dag-en To.

B. Paneknek ey si Jesus ket nan-ongal manipod shi patey Acts 1:3

Basaen tayoy Acts 1:3

Say mepaneknekan ey si Jesus ket nanbiyag mowan ja aliven imagination ira ni discipolos, nan-iyen nin si Jesus shiya shaga ni epat ta polon akhew sakbay ya nay-oli shi dangit. Inkowan nen Lukas ja sota epat ta polon akhew ja inpan-iyen Jesus shiya shaga nonta nan-ongal ket eshakil iray inpa-sas Ton pamaneknek ey nan-ongal Si-khato. Nanpa-sas son Maria Magdalena tan si Maria Matt.28:10; Nanpa-sas son Cleopas tan so nonta ira khait to, John 20:11-18; Nanpa-sas so nonta ira discipolos ton 11, Mark 16:14; Nanpa-sas so nonta ira piton discipolos To, John 21:1-14. Tan eshakil pay i nanpa-sasan To.

Ebadeg ja diwdiwa so nonta ira discipolos ta nanshanag tan edismaya ira nonta inon-an sha sota dingdingkha ira nonta makontra son Jesus, son Jesus, nem niman wara mowan si Jesus son si-khara.

Inkowan nen Lukas sota dingkha nen Jesus ni inpan-iyen To nin shiya shaga. Asen tayo mowan sota naonod ja parti ni verse 3, ma-sas tayod jay sota inkowan To so nonta ira discipolos. (Nantatabalanan sha mowan i maypangkep ni pantoshayan nen Apo Shiyos)

C. In-akan nen Jesus sota importanti jen bilin To Acts 1:4-5,8

Waray in-akan nen Jesus so nonta ira discipolos To ja kasapolan na dag-en sha. *Basaen tayoy Acts 1:1-4*. Amta nen Apo Jesus i plano nen Apo Shiyos, isonga niman pan-isagana ira sota discipolos To, ta may-odi ma shi dangit. Sota ira discipolos ket eg sha maevatan na kosto sota mepesamak. Nem angken eg sha nin maevatan, kasapolan na dag-en sha sota panpedekha nen Jesus son si-khara.

Say plano nen Apo Shiyos son Jesus, may-odi shi dangit. Isonga emili si Jesus ira ni discipolos ja mansilbi son Si-khato no may-odi la shi dangit. Nganto sota mensahe jen piyan Jesus ja itoro so ni eshom? Matthew 28:19-20.

Angken may-odi si Jesus shi dangit, aliven piyan ton esden na baybay-an To ma iray discipolos To. Eg baybay-an nen Apo Shiyos iray anak To.

Asen tayoy, Acts 1:8. Ebadeg i tolong niyay ya verse so nonta ira discipolos, inamtaan sha ey aliven aabos sha shi pengikowan sha ni maypangkep son Jesus shi eshom, eg ira baybay-an nen Jesus. Inkowan nen Jesus son si-khara ey ibetkhag ali nen Apo Shiyos sota Ispirito Santo ja mengikhan son si-khara ni panakabalin shen mengikowan ni Mapteng nga Shamag so ni emin na totoo.

Shi panakabalin bengat nen Apo Shiyos ja ma-itenengan ira ni totoo sota mensahe To. Isonga kasapolan na tongpalen nonta ira discipolos sota inbilin nen Jesus son si-khara ey seskheren sha sota Ispirito Santo shi Jerusalem.

D. Nay-oli si Jesus shi dangit Acts 1:9-11

Basaen tayoy Acts 1:9

Nonta naksheng nga tinabtabal nen Jesus iray apostol To, kimayang ja indekjas To ira et dimaw shi dangit, jet binoja nonta ira apostol To i To kepankejang ingkatod eg mala mayshedmang. Nonta wared naykayang, esa-dinan ni kolpot isonga eg mala insas ira ni apostol To.

Konwari wara kito nontan na akhew. Ngantoy maikowan jo, piyan pay ngata ira nonta discipolos ja asen si Jesus?

Basaen tayoy Acts 1:10-11. Sipa ngata ira iya showen ekitabtabal son si-khara? (Angel)

Masas tayod jay ya verse i kinapodno nen Apo Shiyos, inbetkhag To iya showen angel ja mengikowan son si-khara niyay ya mensahe. “Sajay ya si Jesus ja engilekjas son si-khayo ni indaw To la shi dangit ja nay-olop shi kolpot, inges niyay met laeng aliy i-oli To.”

E. Shi sha kepanessesked nankarkarag ira. Acts 1:13-14

Idi naksheng nga tinabtabal ira ni angel, pinati ira nonta disciplos si Jesus jet nay-oli ira shi Jerusalem. Nay-oli ira nodta naykayang nga kowarto ni baley ya sha kepan-iyani. Shi sha kepanessesked nonta Ispirito Santo jen ibetkhag ali nen Apo Jesus, ira kaemesa-sa-nop ni olay ya mankararag son Apo Shiyos. Eg sha inpalobos jen mewesha son si-khara i takot ta indekjas da iren Jesus, no diket say dingkhara binosbos sha i oras shen man-o-olnong jen mankararag ni sha kepanessesked nonta inkari nen Jesus jen ibetkhag To alin Ispirito Santo.

F. Nanpili ira ni maysa-dat son Judas Acts 21-25.

Si Pedro dimayat shi sango-an sha et nan-esel so nonta totoon naolnong. Inkowan nen Peter ira so nonta emati ey nonta kinontra nen Judas si Jesus, etongpal la emin sota inkowan nen Apo Shiyos. Tan inkowan to son si-khara ey kasapolan na manpidi ira ni maysa-dat son Judas ja apostol. Nem sota maysa-dat son si-khato ket kasapolan na sota sakey ja eki-odo-odop ni olay son si-khara manshoki nonta kepemonjag nen Juan ingkhato nonta akhew wa indekjas ira nen Jesus ni indaw To la shi dangit.

Jet waray showen daleki ja nanpilian sha; si Justus tan si Matthias. Nankararag ira son Apo Shiyos no sipa i isa-dat To son Judas. Jet say epilin naysa-dat son Judas ket si Matthias.

G. Conclusion

Pinati ira nonta apostol sota inkowan nen si Jesus son si-khara, singkhed sha shi Jerusalem sota Ispirito Santo. Jet shi inpansekhed sha nankarkarag ira.

Ayshi i bayag to, sota Ispirito Santo, ibetkhag ali nen Apo Shiyos son si-khara. Sota Ispirito Santo i mewesha ma son si-khara ni olay, mewesha son si-khara shi emin na dawan sha. Sota Ispirito Santo i mengi-kan ni kabaalan shen ontongpal nonta importanti obda jen dag-en sha, sota mengibingay ni Mapteng nga Shamag so ni totoo.

Nonta indaw nen Jesus shi dangit eg sha kito binaybay-an. No tayo kapatia jen Etey shi koros khabol ni basol tayo tan nan-ongal ni maykatdon akhew, nonta timpon inpamati tayo, sota Ispirito Santo nan-iyen son si-khatejo. Sota Ispirito Santo wara ma son si-khatejo ni olay ja man-iyen. Angkhen toway dawdawan tayo wara Si-khato. Isonga wara koma i imdeng tayo ni olay ta wara son si-khatejoy Ispirito Santo.

Memory Verse:

Acts 1:8: “But you will receive **power** when the **Holy Spirit** comes on you; and you will be My **witnesses** in Jerusalem, and in all Judea and Samaria, and to the ends of the earth.”